

KERJASAMA STRATEGIK GALAK GUNA RINGGIT, BAHT

» Bank Negara Malaysia, Bank of Thailand meterai MoU kukuh dagangan, pelaburan dua negara



Prasarn dan Zeti pada majlis memeterai MoU galak penggunaan ringgit dan baht di Kuala Lumpur, semalam.

Oleh Mahanum Abdul Aziz
mahanum_aziz@bh.com.my

Bank Negara Malaysia (BNM) menjalin kerjasama strategik dengan Bank of Thailand (BoT) bagi menggalakkan penggunaan ringgit dan baht dalam penyelesaian perdagangan dan pelaburan, sekali gus mengurangkan pendedahan kepada keadaan pasaran global yang semakin tidak menentu.

Ia susulan termeterainya memorandum persefahaman (MoU) berkaitan pembentukan rangka kerja usaha sama itu antara Gabenor BNM, Tan Sri Dr Zeti Akhtar Aziz dan Gabenor BoT, Dr Prasarn Trairatvorakul di Kuala Lumpur, semalam.

Permudah dagangan rentas sempadan

"Kerjasama strategik itu juga bertujuan meningkatkan lagi aliran perdagangan dan pelaburan dua hala kedua-dua negara," kata Bank Negara dalam satu kenyataan.

Menurut BNM, pemetaraan MoU itu juga menunjukkan komitmen kedua-dua bank pusat menggalakkan penggunaan ringgit dan baht oleh sektor swasta untuk urusan penyelesaian perdagangan merentas sempadan dan pelaburan langsung.

Ia berkata, dengan meng-

galakkan penyelesaian perdagangan dua hala dan pelaburan langsung dalam mata wang tempatan akan mengurangkan risiko pendedahan turun naik mata wang penyelesaian global.

Malah, langkah itu juga dilihat dapat mengurangkan kos transaksi kepada sektor perniagaan di tengah persekitaran pasaran global yang mencabar ketika ini.

Integrasi kewangan

"Pembentukan rangka kerja ini akan merintis jalan ke arah integrasi kewangan dan ekonomi yang lebih meluas di rantau ASEAN.

"Kerjasama dua hala ini akan mengukuhkan lagi aliran perdagangan dan pelaburan antara Malaysia dengan Thailand serta mendorong hubungan ekonomi yang lebih erat untuk kemajuan rantau ini," kata Zeti.

Sementara itu, Prasarn berkata, kerjasama dua hala berkenaan menandakan pencapaian penting bagi menyokong komitmen kedua-dua negara untuk menggalakkan penggunaan mata wang tempatan bagi penyelesaian perdagangan dan pelaburan dalam kalangan komuniti ASEAN.

"Saya percaya (kerjasama) ini akan mengukuhkan lagi kerjasama serta menggalakkan perkembangan ekonomi dan pelaburan di rantau ini," katanya.

"Pembentukan rangka kerja ini merintis jalan ke arah integrasi kewangan dan ekonomi yang lebih meluas di rantau ASEAN"

Zeti Akhtar Aziz,
Gabenor BNM